

HÉBREUX, KAPU YA ZOLE ²



...kwiza ntete, mpe longoka Masonuku, samu ti yandi fwanikisa yawu mpe ke mona kana ya vwandaka Kieleka to ve. Yandi bakaka yawu, Kieleka, na nzila ya Ngwisani ya Ntama. Ntangu yayi, Paul vwandaka kizabi ya Ngwisani ya Ntama. Bantu yikwa zaba yawu? Yandi longokaka na yisi ya mosi ya bizabi ya kulutila ya kilumbu ya yandi, Gamaliel, kizabi ya mutindu yankaka. Mpe Paul vwandaka zaba Ngwisani ya Ntama. Mpe mu banza ti kuningana ya yandi ya ntete, mutindu mu vwandaka me tuba na suka yayi, ntangu yandi vwandaka mbangi ya lufwa ya Étienne. Ya fwana vwanda na kima simbaka Paul, samu ti na masonuku ya yandi nyonso yandi ke landila na kuvutukila na yawu, “Mu kele ya kulunga ve, samu ti mu talisaka Dibuundu mpassi tii na lufwa. Mu kele ya kulutilka fyoti na kati ya bawu.”

⁹⁵ Oh, kasi Nzambi vwandaka na dibanza yankaka na yawu. Yandi vwandaka mosi ya babakala ya nene ya kilumbu.

Mona Santu Paul, ntumwa ya nene
Na robe ya yandi ya kitoko, (tubaka poète)
Oh, kieleka milolo ke wakana
Ntangu beto nyonso ke kutana Kuna.

Kilumbu yango ya nene ntangu mu ke mona yandi kuzwa yimpu ya kimfumu ya mbangi, musendo ya mbangi!

⁹⁶ Mu telamaka pene ya kivinga ya fyoti ya ntama, awa ntama mingi ve, kisika yandi sonikaka Mikanda yayi. Mpe na manima ba zengaka yandi yintu. Mpe ba losaka yandi na ba-égout, samu ti ba-égout nata yandi. Mpe mwa Juif yayi kuna, yandi tubaka, “Mu ke na kunata na nzutu ya munu bidimbu ya Yesu Klisto. Mu me nwana na bibulu na Éphèse, kasi mu me nwana muzingu ya mbote. Mu me manisa kukima mbangu. Mu me simba Lukwikilu. Mpe katuka ntangu yayi, kuna kele ya kutula samu na munu yimpu ya ludedomo, yina Mfumu, Zuzi ya kudedama, ke pesa munu na Kilumbu yina. Mpe ve kaka munu, kasi bawu nyonso yina ke zolaka kumonisama ya Yandi.” Mutindu mu zola yawu! Oh, mu zola ba tanga munu na bawu yina! Beto vwanda yimbaka nkunga mosi:

Oh, nge zola ba tanga nge mutindu mosi ya
mameme ya Yandi?
Nge zola ba tanga nge mutindu mosi ya
mameme ya Yandi?
Vwanda ya kukondwa ditona na kati, kulala ve
mpe vingila kimpa ya kumona;
Yandi ke na kwiza dyaka.

97 Mu zola kuvwanda mosi ya bawu. Ntangu yayi musoniki me kwenda na ntwala, na kutubaka:

Na yawu beto fwana kupesa...kuvwanda ya kukwikama na bima yina beto me kuwa, na boma ti beto kunatama ntama ya yawu.

98 Mutindu beto vwandaka me longoka yawu, na suka yayi, nzila ya 2 ke tuba, “Kana . . .”

Samu ti kana dyambu yina bawanzio kuzonzaka . . .

99 Yinki beto me mona *bawanzio* kele? Baprofete. “Nzambi zonzaka na bantangu mingi . . .” Ntangu yayi, beno fwana sala, dibanza ya beto mosi ve, kasi Biblia. Ntangu yayi kapu ya 1te, ya . . .kapu ya 1te, nzila ya 1te.

Nzambi, na bantangu mingi . . .na mitindu mingi zonzaka . . .na batata na nzila ya baprofete,

100 Ntangu yayi yandi ke kwenda ntama awa, mpe ke tuba dyaka.

Samu ti kana dyambu yina bawanzio kuzonzaka lakisaka mfunu ya yawu, . . .

Mpe yinki zola kutuba *wanzio*? “Munati nsangu.” Kana Nzambi me pakula munati nsangu . . .Mpe na yina kana beto kele ya kupakulama, beto kele minati nsangu ya Nzambi. Beto kele minati nsangu na yinza, mvwala ya Mazulu, na kutubaka ti beto kele bizyeti mpe banzenza. Beto kele ve ya yinza yayi. Kasi beto ke na kusosa Mbanza yina ke na kwiza, yina Kitungi mpe Kiyidiki kele Nzambi. Beto kele ve na bimvwama na zulu ya ntoto, kisika miyibi ke kotaka, mpe banselele, mbungi, mpe ke pola. Samu ti, bivwama ya beto kele na Mazulu, kisika Yesu me vwanda na diboko ya bakala ya Kimfumu. Oh, wapi kima ya nkembo mpe ya kuyituka, na kuzaba ti:

Bivuvu ya beto kele ve ya kutunga na kima ya mpamba

Ti na Menga ya Yesu mpe ludedomo;

Ntangu bima nyonso pene-pene ya moyo ya munu ke na kubeba,

Kuna Yandi kele kivuvu ya munu nyonso mpe lusalusu.

Na Klisto, Ditadi ya ngolo, mu me telema;

Bisika yankaka nionso kele putulu,

Bisika yankaka nionso kele putulu.

101 Mutindu Eddie Perronet kusonikaka nkunga yayi, na kati ya bantangu ya nkwamusu!

Ntangu yayi, kana ndinga yina bawanzio kuzonzaka lakisaka mfunu ya yawu, . . .(Ntangu munati nsangu ya Nzambi kuzonzaka Ndinga, Yawu vwanda kondwa

mfunu ve.) . . . mpe konso kitumbu *kuzwaka kitumbu ya kulunga;*

Wapi mutindu beto ke kima ntangu yayi, *kana beto* kuwa ve Klisto, Yandi yina ke na kuzonza katuka Mazulu?

Ntangu yayi beno tala mbote:

Wapi mutindu beto ke kima, kana beto zimhana mpulusu ya mfunu yina; . . . (Benozanza na yawu.) . . . *yina na ntete* na kubanda *Mfumu kuzabisaka . . .*

¹⁰² Klisto kubandaka kisalu ya Yandi. Yinki Yandi salaka? Beto me tala Yandi mbote, mutindu Yandi . . . ya kulemvuka, ya lembami, mutindu Yandi vwanaka ve muntu ya nene mutindu muntu ya théologie. Kasi Yandi vwanaka ya kulemvuka, ya lembami, muntu ya mbote. Yandi vwanaka ve mulongi ya ngolo. Ndinga ya Yandi vwanaka wakana ve na bala-bala.

Kasi Jean kwendaka na ntuala mutindu nkosi yina ke na nsatu. Yandi vwanaka mulongi.

¹⁰³ Yesu kwendaka na ntuala, mutindu nkosi yina ke nsatu ve, kasi Nzambi vwanaka sala na Yandi, vwanaka siamisa Ndinga. Nzambi vwanaka na Klisto. Pierre tubaka, na Kilumbu ya Pantekote, “Benobantu ya Israël, mpe beno yina ke zingakaka na Judée . . . Yesu ya Nazareth, Muntu yina Nzambi me siamisa na kati ya beno, na nzila ya bidimbu mpe mambu ya ngitukulu mpe bimangu, yina Nzambi salaka na nzila ya Yandi, na kati-kati ya beno nyonso, yina beno nyonso kele bambangi.” Benotala mbote mutindu yandi bwetaka yawu na bawu. “Benozolaka zaba Yandi.”

¹⁰⁴ Yesu tubaka, “Benobantu ya luvunu.” Yandi tubaka, “Beto ke basika na ngaanda mpe ke tala mwini, mpe beno . . . Ya kele mbwaki mpe ndombi, beno ke tuba, ‘Ya ke noka.’ Mpe kana ya kele kitoko mpe na mwini, to nyonso yina, beno ke tuba, ‘Ya ke noka ve.’” Yandi tubaka, “Benozaba kumona dizulu, kasi bidimbu ya ntangu, benozaba ve kumona. Samu ti kana benozabaka Munu, benozolaka zaba kilumbu ya Munu.”

¹⁰⁵ Oh, mutindu Yandi ke boka na nkokila yayi. Mutindu Mpeve ya Yandi ke boka na nzila ya milongi ya Yandi, “Ngunga me kuma pene-pene!”

Beto ke zaba kumona. Beto ke tala mbote ba-bombe atomique. Beto zaba nani ke baka kisika ya Clark Gable, mpe yina ke sala *yayi, yina*, to *yankaka*; to yina ke vwanakilandi ya ntwadisi ya yinsi. Beto ke sepela na yawu, kasi beto ke zaba kumona ve bidimbu ya ntangu. Beto me kuma na nsuka.

¹⁰⁶ Yinki ya kele? Beto ke sepela mingi na, “Yinki kele épisode yina ke landa na televizizo? Yinki Suzie ke sala?” to yinki kele nkumbu ya kento yina. “Mpe wapi kisika Arthur Godfrey ke kwenda? Wapi mutindu ya nsaka yandi ke sala mbala yankaka?”

Beto, mutindu Miklisto, ke fulusa bayintu ya beto na buzoba ya mutindu, na yina beto fwana vwanda na kati ya bisambu na kisika mosi, mpe kutanga Biblia, samu na kuzaba bidimbu ya ntangu beto ke na kuzinga.

¹⁰⁷ Yina ke salaka yawu, na bambala mingi, kele kulemba ya bantu na manima ya ba-chaire, ya kele kieleka, bayina ke kulumukaka ve mpe ke nataka ve Nsangu ya mbote ya Kieleka. Beto ke pesa mvutu na yawu na bilumbu ke na kwiza. Beto fwana bika na lweka kima mosi ve. Mpe bantu, mutindu beto kele awa na Branham Tabernacle yayi, ke mona bidimbu mpe mambu ya ngitukulu, mpe ngolo ya Klisto yina me vumbuka; mpe kuna beto zaba ti beto ke tula bantangu ya beto—ya beto na zulu ya bima yankaka, mpe ke bika na lweka na kuwa Ndinga ya Mfumu Yesu, “Wapi mutindu beto ke kima, kana beto bebisa mutindu ya mpulusu ya mfunu yina?”

¹⁰⁸ Nzila ya 3, to nzila ya 4. Awa kele kisika beto sukaka, na nzila ya 4, na suka yayi.

Nzambi mpe pesaka kimbangi ya bawu, . . . (Oh, la la!)

Nzambi . . . pesaka kimbangi ya bawu, . . .

Beno kuwa Ndinga.

. . . na bidimbu . . . mambu ya ngitukulu, mpe na bimangu ya konso mutindu, . . .

Yinki kele bimangu ya *konso mutindu*? Yinki kele *konso mutindu*? *Konso mutindu* zola kutuba “mingi.” “Na bimangu *mingi*, Nzambi pesaka kimbangi.” O Nzambi! Mu ke na kivuvu ti Ya ke kota na kati ya bantima ya beno. Beno kuwa.

¹⁰⁹ Mu kele mosi ya ba-pasteur ya beno, na Mpangi Neville awa. Mu zola ti beno sonika Yawu. Biblia ke tuba, “Kana ya ke telama na mosi na kati ya beno, mpe ti yandi tuba *yayi-mpe-yayi*, mpe ti ya salama ve, beno kuwa yawu ve, samu ti Munu ve me tuba. Kasi kana yandi zonga na Nkumbu ya Munu, mpe ti yina yandi me zonga kusalama, kuna beno kuwa Yawu.” Amen. “Samu ti Mu kele na profete yina, to mulongi yina, to nyonso ya lenda vwanda. Kana yina yandi me tuba me salama, kuna beno kuwa yandi.”

¹¹⁰ Ntangu yayi, bankundi, beto kuwa Yandi, Mpeve-Santu kuzonga na kati ya beto, na kulakisaka bimangu ya konso mutindu, mpe bidimbu, mpe mambu ya ngitukulu. Beto luta kaka ve na zulu ya Yawu mutindu kaka bima ya mutindu nyonso. Beto bambuka moyo ti Yawu kele Yesu Klisto, mutindu mosi mazono, bubu yayi, mpe kukondwa nsuka; na kusiamisaka Ndinga ya Yandi. Beto fwana sala yawu. Oh, lemvo beno sala yawu. Beno sala keba. Ti kima nyonso yankaka kuvwanda na kisika ya zole, mpe yinzo ya beno, bakala ya beno, kento ya beno, bana ya beno. Nyonso ya lendaka vwanda, beno tula yawu na kisika ya zole. Beno tula Nzambi na kisika ya ntete. Beno ke tuba, “Mpangi Branham, na zulu ya bana ya munu?” Na zulu

ya kima nyonso. Beno tula Nzambi na kisika ya ntete. Beno bika Yandi kuvwanda na kisika ya ntete.

111 Élie kulumukaka na mongo, kilumbu mosi. Yandi vwandaka wanzio, munati nsangu, munati nsangu ya Nzambi, ya kupakulama. Mpe yandi monaka mufwidi mosi ya kento vwandaka lokota bankuni zole. Yandi tubaka, “Kwenda, sala munu mwa gâteau, mpe natina munu mwa maza.”

112 Mpe kento tubaka, “Mutindu moyo ya nge ke zinga, mu ke kaka na ba-gâteau ya kulunga, to pâte ya falini ya blé ya kulunga, samu na kusala mwa galette mosi. Mpe mu ke kaka na mafuta ya kulunga, samu na kuvukisa yawu, nyonso. Mpe mu ke na kulokota bankuni zole.” Mutindu ya kusala ya ntama vwandaka, ya kele mutindu ya bantu ya Inde, ya kuvukisaka bankuni mpe kunyengisa yawu kubanda na kati-kati, mpe kulandila na kupusa yawu. Mu me salaka bambala mingi tiya ya camp mutindu yina. Yandi tubaka, “Mpe mu ke kwenda lamba mwa gâteau yango samu na munu mpe mwana ya munu ya bakala, mwana ya munu. Mpe beto ke kudya yawu mpe kufwa.” Kukawuka vwandaka bamvula tatu mpe bangonda sambanu, maza vwandaka ata kisika mosi ve.

113 Profete yango ya makasi, ya kiboba, talaka kento yango na kizizi. Yandi tubaka, “Kwenda, sala ntete munu gâteau.” Wapi lutumu, samu na bakala na kutuba na mufwidi ya kento, yina ke na kufwa na nsatu, samu na kudikisa yandi ntete. Yinki yandi tubaka? “Samu ti MUTINDU ME TUBA MFUMU, mbungu ke vwanda ata mbala mosi ve ya mpamba, to diyuki kuyuma, tii Nzambi ke fidisa mvula na zulu ya ntoto.”

Ntete, Nzambi. Yandi kotaka mpe salaka mwa gâteau yango, mpe kwizaka pesa yawu na profete. Yandi vutukaka na mbala mosi mpe salaka mosi yankaka, mpe mosi yankaka, mpe mosi yankaka, mpe yankaka. Mpe mbungu ata mbala mosi kumaka mpamba, to diyuki yumaka, tii Nzambi fidisaka mvula na zulu ya ntoto. Yandi tulaka Nzambi na ntwala ya bana ya yandi. Yandi tulaka Nzambi na ntwala ya kima nyonso yankaka. Yandi bakaka ntete, Kimfumu ya Nzambi.

114 Nzambi fwana kuzwa kisika ya ntete na kati ya ntima ya beno, kisika ya ntete na kati ya luzingu ya beno, kisika ya ntete na nyonso yina beno ke sala to yina beno kele. Nzambi fwana vwanda ntete. Yandi zola ve kisika ya zole. Yandi ke fwana ve na kisika ya zole. Yandi ke fwana na ya kulutila, mpe ya ntete, mpe nyonso yina kele na beto. Yandi ke fwana na yawu. Kusakumuna vwanda na Nkumbu ya Yandi ya Santu!

Samu ti Nzambi mpe pesaka kimbangi... yandi pesaka kimbangi, na bidimbu mpe mambu ya ngitukulu, . . . bimangu ya konso mutindu, mpe makabu ya Mpeve-Santu, landila luzolo ya yandi mosi?

115 Ve yina bantu ke tuba, yina dibuundu tubaka, kasi yina luzolo ya Nzambi vwandaka. Oh, beto ke na nsatu ya kusosa luzolo ya Nzambi, kuzwa muswa ve ya mfinangani ya beno, kuzwa muswa ve ya bana ya beno, kuzwa muswa ve ya bakala ya beno to ya kento ya beno. Kasi, beno sosa ntete luzolo ya Nzambi, mpe beno sala yawu ntete. Na manima nyonso yankaka, luzolo ya kento ya beno mpe luzolo ya bana ya beno, nyonso ke tandama na zulu ya yawu. Kasi, beno tula Nzambi na kisika ya ntete.

116 Beno tala mbote, ntangu yayi.

Ya kieleka na lutumu ya bawanzio ve yandi tulaka yinza ke na kwiza, ti beto ke na kuzonzila.

117 Kana ve, Bawanzio ya nene yina ke salaka na Mazulu, Gabriel, Michel, Absinthe, mpe makumi ya mafunda ya bambala makumi ya mafunda ya Bawanzio ya Mazulu; to makumi ya bankama ya baprofete yina vwandaka na zulu ya ntoto, mosi na mosi ya bawu; Yandi ata mbala mosi ve kutulaka mosi ya bawu na kuyala na zulu ya yinza ke na kwiza, ti beto ke na kuzonzila. Ata mosi ve! Yandi tubaka ata mbala mosi ve, “Ésaïe, nge ke yala yinza.” Yandi ata mbala mosi ve tulaka yinza na lutumu ya Élie. To dyaka ti Yandi tulaka yawu na Gabriel, to na wanzio mosi, na mpeve mosi na kisalu.

118 Beno tala mbote yina yandi tubaka, Paul, ke na kulandila na kukembila Klisto, yina beto ke na kuzonzila.

Kasi mosi kisika mosi pesaka kimbangi, na kutubaka, Nani kele muntu, samu ti nge bambukila yandi moyo? to mwana ya muntu, ti nge ke kwiza tala yandi?

Nge me sala yandi mwa yisi kulutula bawanzio; nge me byadisa yandi na nkembo mpe na buzitu, mpe me tula yandi na zulu ya bisalu ya diboko ya nge:

119 Ntangu yayi, kana beno zola kutanga yawu, ya kele na Psaumes 8:4-6, David ke na kuzonza. Ntangu yayi wapi mutindu yandi me bokila David awa? Yina ke sukisa dyambu, kaka kuna, kana mu vwandaka vuna to ve na suka yayi, na yina me tala profete.

120 Yandi tubaka, “Samu ti mosi ya bawanzio tubaka na kisika mosi.” David, munati nsangu ya Nzambi, vwandaka wanzio ya Nzambi, samu ti yandi vwandaka munati nsangu ya Nzambi. Wanzio tubaka, David tubaka, na Psaumes, “Nge me sala Yandi mwa yisi kulutula Bawanzio ya Mazulu.” Wanzio mosi tubaka ti Nzambi salaka Yandi yisi kulutula Wanzio, ti Yandi zolaka byadisa Yandi; mpe Yandi zolaka kutala mpasi mpe kumeka lufwa, samu na kuzangula dyaka. Samu ti Yandi sala Yandi. . . kubyadila bima nyonso ya yinza. [Kisika ya mpamba na bande—Mu.]

121 Ntangu yayi, na—na Matthieu 28:18, beto ke tanga yayi. Na manima ba me koma Yandi mpe me vumbuka dyaka kilumbu

ya tatu, Yandi kutanaka na bilandi ya Yandi mpe tumaka bawu na kukwenda na yinza muvimba, samu na kulonga Nsangu ya mbote na konso kivangu. Yandi tubaka, “Bangolo nyonso na Mazulu mpe na ntoto me pesama na maboko ya Munu. Ngolo nyonso na Mazulu, ngolo nyonso na ntoto, me pesama na Munu.” Yinki ya vwandaka? Muntu na Nzambi me vukana. Logos me kuma muntu mpe me kufwa, mpe me vumbuka dyaka samu na lunungu ya beto, mpe vwandaka kuna Emmanuel ya kupakula ya kukonda nsuka mpe kukonda nsuka. Nzambi sobaka kisika ya Yandi ya kuzinga, katukaka Kiti ya kimfumu kuna na mazulu, na ntima ya Mwana ya Yandi, Klisto Yesu, samu na kuzinga mpe kuyala kukonda nsuka. “Nzambi vwandaka na kati ya Klisto.” Yandi kele kisika ya nsuka ya kupema ya Mpeve.

¹²² Mpeve zingaka na kati ya tabernacle, kilumbu mosi, beno zaba yawu, na yisi ya tenta. “Mpe Salomon tungilaka Yandi yinzo. Kasi, ata ti, ya Zulu mingi ke zingaka ve na kati ya bayinzo yina maboko me sala.” “Kasi Nge me salila Munu nzutu.”

¹²³ Kuna na Buku ya Actes, kapu ya 7, ntangu yandi vwandaka zonza, yandi tubaka, “Bawu nyonso monaka Yawu na ntuala. Ba tungilaka Yandi tenta, Moïse salaka, salaka tenta, mpe tulaka nzasa na kati kuna, samu ti Nzambi vwandaka na zulu ya Kiti ya Kyadi. Yandi zingaka kuna ve.” Mbote mingi.

¹²⁴ Na manima, “Nge me salila Munu nzutu,” nzutu ya Mfumu Yesu Klisto, vwandaka yisi kulutila Bawanzio samu na kumeka lufwa; mpe mosi yankaka ve kasi yina ya kulutila zulu ya Zulu, Klisto; Mwana ya ntinu ya bakala ya Ngemba, Ntinu ya bantinu, Mfumu ya mfumu, Kiyidiki ya konso bwetete na yinza ya muvimba.

¹²⁵ O Nzambi! Yandi kumaka yisi kulutila kivangu ya Yandi, samu Yandi kulenda na kukuula bantu (bantu ya kukondwa yinzo, ya kukondwa ngolo), mpe kupesa bawu yinzo na Mazulu. Yandi bikaka mikembo ya Mazulu. Yandi bikaka Nkumbu ya kulutila zulu yina ba lendaka bokila. Mpe ntangu Yandi vwandaka na zulu ya ntoto, bantu pesaka Yandi nkumbu ya yisi mingi na yina ba zolaka pesa Yandi, bawu vwandaka tuba, “Yandi vwandaka mwana ya makangu, na kubanda.” Kubutamaka na kidikulu ya bibulu, ya kufuka na bitende yina ba bakaka na manima ya kizitu ya ngombe. Vwandaka na kisika ya kukwenda ve, kuzwaka yinzo ya kukwenda ve. Mpe ba vwandaka bokila Yandi, “Béelzébul,” mfumu ya bampeve ya yimbi. Ba vwandaka nyokula Yandi. Ba vwandaka losa Yandi mata. Ba vwandaka seka Yandi. Ba mangaka Yandi, mpe Yandi kwendaka tii na mabulu ya yisi mingi mpe kulukaka na “Bakento ya kindumba ya kukondwa luvalu.” Ya kele yina bantu salaka Yandi.

¹²⁶ Kasi Nzambi zangulaka Yandi zulu mingi ti Yandi zolaka tala na yisi na kumona Mazulu. Bantu pesaka Yandi kiti ya

yisi mingi, pesaka Yandi kisika ya kulutila yimbi, nkumbu ya kulutila yisi. Nzambi zangulaka Yandi mpe pesaka Yandi Kiti ya kulutila zulu, mpe Nkumbu ya kulutila zulu. Ya kele luswaswanu yina bantu salaka na Mwana ya Nzambi, mpe yina Nzambi salaka na Mwana ya Nzambi.

¹²⁷ Yandi kulumukaka, samu ti beto vwanda ya kuzanguka. Yandi kumaka beto, samu ti beto na nzila ya lemvo ya Yandi lendaka kuma Yandi. Yandi kwizaka na bayina vwandaka ve na bayinzo, mpe kumaka Yandi mosi ya kukondwa yinzo, samu ti beto kuzwa yinzo. Yandi kwizaka na bambevo mpe kumaka ya kubela Yandi mosi, samu ti beto kubeluka. Yandi kwizaka na misumuki, “mpe kumaka disumu, Yandi mosi,” samu ti beto kuzwa mpulusu.

¹²⁸ Ya kele kukondwa ntembe ti ba zangulaka Yandi. Kukondwa ntembe Yandi kele Yina Yandi kele na nkokila yayi. Nzambi me zangula Yandi, mpe bangolo nyonso na Mazulu mpe na ntoto me pesama na Yandi.

¹²⁹ Ntangu kisalu ya Yandi na ntoto kumanisaka, awa na zulu ya ntoto. . . Yandi kwizaka na ntoto, na ntangu kaka Yandi salaka, mbwetete ya suka tubaka ti Yandi vwandaka Mwana ya Nzambi. Yandi ningisaka konso mpeve ya yimbi yina kutanaka na Yandi. Kusakumuna vwanda na Nkumbu ya Mfumu! Bampeve ya yimbi tekitaka mpe ninganaka, mpe bondilaka samu na kyadi, na Ntwala ya Yandi. Yinga, tata. Difelo nyonso zabaka Nani Yandi vwandaka.

¹³⁰ Yandi vwandaka tambula na kukilumusa nionso, Yandi vwandaka ve na kisika ya kutula yintu ya Yandi, na mpimpa ya mvula. Baniama yina Yandi vangaka, “Bandeke na mazulu ke na mazanza, mpe mibaku ke na mabulu samu na kubumbama, kasi Mwana ya muntu ke na kisika ve ya kutula yintu ya Yandi ya kusakumuna.” Kieleka, Yandi vwandaka.

¹³¹ Yandi kumaka disumu, kumaka yisi mpe ya kulosama. Kasi bampeve ya yimbi zabaka Nani Yandi vwandaka. Bawu lombaka mawa. Bawu tubaka, “Samu na yinki Nge me kwiza kwamisa beto ntete ntangu ya beto?” Mpe na yina milongi vwandaka bokila Yandi, “Béelzébul, muntu yina ke tubaka mambu na ntwala,” bampeve ya yimbi vwandaka bokila Yandi, “Mwana ya Nzambi ya moyo,” mpe vwandaka bondila samu na kyadi.

¹³² Oh, mutindu beto lenda kaka kutelama minuti kaka! Nani nge kele, na mutindu nyonso? Yinki zola kutuba kisalu yina kele na nge? To yinki zola kutuba mwa yinzo yina kele na beto? Yinki zola kutuba ditoma yina kele na beto?

¹³³ Mwana ya kento ya kitoko, nge mwa kima ya kitoko, yinki ke sala mwa kitoko yina ke na nge ntangu yayi? Beno bantwenya ya babakala na bansuki yina ke na kulezima, ya pete, mapeka ya kutelama mbote; beno ke kondama kilumbu, ntangu mvula ke kulula beno.

134 Kasi, nkembo na Mfumu! Beno ke na moyo yina me butama na mbala zole. Beno ke zinga kukonda nsuka mpe ntangu nyonso, samu ti Yandi me kuma beno, ti beno na nzila ya lemvo ya Yandi lenda kuma Yandi, mpe me sala kisika samu na beno.

135 Oh, beto yina ke banza ti beto ke na bilele yina beto lenda soba, mpe mwa madya na yinzo, nani beto kele? Nzambi lenda katula yawu na sekonde mosi. Kupema ya beno kele na kati ya diboko ya Yandi. Mpe Yandi na kati ya beto ke na kubelusa bambevo, samu na kuzabisa mpe kutuba, mpe kutuba na ntuala, mpe konso ntangu ya kulunga. Mpe ke na kuwa mpasi mingi ti me vutula na lufwa, mbisi ya fyoti na luzingu ya yawu dyaka, na kati ya beto. Jéhovah pene-pene ya beto, Jéhovah na kati ya beto, ya nene mpe ya ngolo MU KELE.

136 Ntangu Yandi kufwaka, bawu banzaka ti bawu me kuzwa Yandi. Yandi kulumukaka na kati ya difelo. Ntangu Yandi bikaka ntoto kilumbu yina ntangu ba komaka Yandi na kulunsi, Yandi kwendaka na kati ya bizunga ya kuzimbana. Biblia ke tuba, “Yandi kwendaka mpe longaka na myoyo yina vwandaka na boloko, yina fungulaka ve masumu ntangu mvibudulu kulandilaka, na bilumbu ya Noé.” Ntangu Yandi kufwaka, mpe ti Mpeve ya Yandi kubikaka Yandi, Yandi kumaka dyaka Logos. Yandi, mu ke mona, ke tuba, “Mu me katuka na Nzambi. Mu ke vutuka na Nzambi.”

137 Mpe Nzambi vwandaka Dikunzi yango ya Tiya yina twadisaka bana na ntoto ya kuyuma. Mpe ntangu Yandi vwandaka awa na zulu ya ntoto. . . Mpe ntangu Yandi kufwaka, Yandi vutukaka na Nsemo dyaka. Paul monaka Yandi, mpe Yandi vwandaka Nsemo. Ata mosi yankaka ya bawu kumonaka Yandi. Bawu monaka Paul kubwa. Kima mosi bwisisaka yandi, mpe Yawu vwandaka Nsemo. Paul tubaka, “Nani Yawu kele yina mu ke na kutalisa mpasi?”

138 Yandi tubaka, “Saul, Saul, samu na yinki nge ke na kutalisa Munu mpasi?”

Yandi tubaka, “Nani Yawu kele?”

139 Yandi tubaka, “Mu kele Yesu, yina nge ke na kutalisa mpasi, mpe ya kele mpasi samu na nge na kutelemina bansende.”

140 Na manima yandi kwendaka mpe longokaka Nsemo yina. Paul vutukaka na Biblia, na kutala yinki vwandaka Nsemo yina. Mpe yandi sonikaka Mukanda yayi. Yandi kele Jéhovah mosi. Nsemo yina kaka vwandaka na ntoto ya kuyuma na bana ya Israël. Mpe ntangu Pierre vwandaka na boloko, Yandi vwandaka Nsemo yina kotaka mpe fungulaka myelo.

141 Mpe na nzila ya lemvo ya Yandi, samu ti muntu ve kuzwa raison. . . Oh, kana bawu lendaka zimbana minati nsangu yina tangaka ve, mpe kubambuka moyo: ya kele ve munati nsangu, ya kele Nsangu. Yandi me kulumuka dyaka, na beto, na nzutu ya Dikunzi ya Nsemo. Mpe Yandi ke na kusala na mutindu mosi ya

Yandi ya bimangu mpe bidimbu, kima ve na ngaanda ya Biblia; kele ya kuvwanda kaka na Biblia, kele ya kusimba yawu na yisi ya lutumu, ke basisa nkembo ya Yandi, ke lakisa ngolo ya Yandi. Nkembo na Nkumbu ya Yandi ya santu!

142 Mu zaba ti beno fwana banza ti mu kele kilawu; kasi, oh, Kupema ya Kukonda nsuka ya kusakumuka yina kele na kati ya moyo ya munu, ata ti bitembo kuningisa, longo ya munu kele ya kusimba na kati ya vwale.

143 Mpe na kumona Yandi ntangu Yandi kufwaka, ti, ngonda kubwaka na kudasuka. Mwini kotaka na kati-kati ya kilumbu. Mpe ntangu Yandi kwendaka na bizunga ya kuzimbana [Mpangi Branham me bula bambala yiya na zulu ya chaire—Mu.] me konkota na kielo, mpe kielo me zibuka. Biblia ke tuba, “Yandi longaka na myoyo yina vwandaka na boloko, bayina fungulaka ve masumu na ntangu mvibudulu kulandilaka na bilumbu ya Noé,” na manima ya lufwa ya Yandi na zulu ya ntoto. Mpangi ya munu ya bakala, mpangi ya munu ya kento, ntangu Yandi kufwaka, kisalu ya Yandi na ntoto kumanisaka, kasi Yandi vwandaka landila na kusala. Mpe Yandi kele dyaka na kisalu na nkokila yayi. Amen.

144 Yandi konkotaka na myelo ya bayina kuzimbanaka. Biblia me tuba ti Yandi salaka yawu. Mpe Yandi pesaka kimbangi, “Mu kele Nkuna ya kento. Mu kele Yandi yina Adam kuzonzilaka. Mu kele Yandi yina Énoch kutubaka ti zolaka kwiza na mafunda kumi ya basantu ya Yandi. Mu kele Mwana ya Nzambi ya moyo, mpe beno sumukaka na kilumbu ya beno ya lemvo. Kasi ba pesaka beno yawu na profesu, na bawanzio, Énoch, Noé, ti Mu fwana kwiza lungisa konso Ndinga ya Nzambi ya Biblia. Mu kele awa mutindu mbangi na ‘yinsi ya kuzimbana’” yayi. Mpe Yandi longaka bawu.

Na yisi na kati ya difelo Yandi kwendaka, mbala mosi na myelo ya difelo, konkotaka na mwelo. Dyabulu fungulaka mwelo, yandi tubaka, “Mu me kuzwa Nge ntangu yayi.”

145 Yandi me botula yandi bafungula yina vwandaka na mukaba ya yandi, tubaka, “Nge dyabulu, nge me vuna katuka ntama.” Yawu yayi, kaka awa na kati ya Biblia. Mu ke kuma na yawu na ntangu fyoti. “Nge me vuna katuka ntama, kasi Mu me kwiza samu na kuyala.” Yandi me baka bafungula yango mpe me losa yandi na kati, mpe me kanga mwelo.

Yandi me luta mpe me baka Abraham, Isaac, mpe Jacob. Na kilumbu ya tatu Yandi me vumbuka, mpe bayina vwandaka ya kulala na ndyamu kuvumbukaka na Yandi. Oh, alleluia! Kukondwa ntembe ti poète kutubaka:

Na luzingu, Yandi zolaka munu; na lufwa,
Yandi vulusaka munu;
Na kuzikama, Yandi nataka ntama masumu ya
munu;

Na mvumbukulu, Yandi vedisaka ya mpamba
ntangu nyonso:
Kilumbu mosi Yandi ke kwiza—oh, Kilumbu ya
nkembo.

146 Nsinga yina me kanga bantima ya beto kusakumuka na ngwisani ya Buklisto, zola ya Nzambi. Ntangu Yandi vumbukaka, Yandi manisaka, ntete ve. Yandi vwandaka na mwa kusalu mingi ya kusala.

147 Biblia ke tuba, “Yandi mataka na Zulu mpe pesaka makabu na bantu.” Ya vwandaka na mvwandulu ya kukangama na zulu ya ntoto, ya ndombi, ya mpimpa, ya lufwa, mpe ya kulemba. Bisambu vwanda mata ve, samu ti Kukatula-masumu vwandaka ve. Kasi, Yandi pasulaka vwale yango. Yandi fungulaka nzila. Yandi zengaka vwale ya kubela. Yandi zengaka vwale ya disumu. Yandi zengaka vwale ya kulemba. Yandi zengaka vwale yina vwandaka ya kubwa. Yandi zengaka konso vwale, mpe salaka nzila samu na kizyeti, yina ke mata nzila ya Ntinu. Oh, la la, ntangu Yandi lutaka ngonda mpe bambwetete, na kulandilaka mpe kulandila!

148 Na kulandaka, na manima ya Yandi, kwizaka basantu ya Ngwisani ya Ntama, Abraham, Isaac, mpe Jacob. Bawu kwendaka mbala mosi na mazulu ya Mazulu. Ntangu ba vwandaka ntama mingi na Mbanza, mu lenda mona bawu kunangula meso ya bawu. Abraham tubaka, “Ya kele Mbanza yina mu zola kumona. Oh, kwiza awa, Isaac. Kwiza awa, Jacob. Oh, beto vwandaka bizyeti mpe banzenza na ntoto, kasi ya kele Mbanza. Ya kele Yina beto vwandaka vingila.”

149 Mpe Biblia ke tuba ti bawu bokaka, “Beno telama, bamwelo ya seko, mpe beno telama, samu ti Ntinu ya Nkembo ke na kwiza na kati.”

150 Mpe Bawanzio na manima ya bankotolo pesaka mvutu na bawanzio yayi na manima awa, mpe tubaka, “Nani kele Ntinu yayi ya Nkembo?”

151 Mpe bawanzio awa, baprofete, tubaka, “Mfumu ya Basoda, ya Ngolo mingi na mvita.”

152 Mpe bawu bwetaka ba-buton mpe mwelo ya nene me funguka. Mbala mosi na kati-kati ya babala-bala Yandi me kwiza, Kinungi, me nunga, na basantu ya Ngwisani ya Ntama yina vwandaka tambula na manima ya Yandi. Yandi me vwanda na zulu ya Kiti ya kimfumu, me tuba, “Tata, bawu yayi. Bawu kele ya Nge.”

153 Yandi tubaka, “Mata awa mpe vwanda, tii Mu ke sala bambeni ya Nge nyonso na yisi ya makulu ya Nge.” Na yina beto ke tanga, beto ke tala yawu awa na Masonuku. Mbote mingi.

154 Beno kuwa. Ntangu yayi na yina beto kele na nzila ya 8 yayi:

Na yina yandi me tula bima nyonso na lutumu na yisi ya makulu ya yandi. Samu ti . . . yandi me tula bima nyonso na lutumu na yisi ya dikulu ya yandi, yandi me bika kima ve yina kele ve . . . na yisi ya yandi. Kasi ntangu yayi beto ke mona ve . . . bima nyonso kutula na yisi ya yandi.

Yina kele, lufwa. Beto ke na kumona ntete ve, lufwa, samu ti beto ke na kufwa dyaka. Beto ke na kumona lufwa.

Kasi, nzila ya 9, “Kasi beto ke mona Yesu!” Amen. Beno kuwa.

. . . beto ke mona Yesu, yina ba salaka mwa yisi kulutila bawanzio samu na mpasi ya lufwa, me byadisama na nkembo mpe buzitu; samu ti yandi na nzila ya lemvo ya Nzambi zolaka meka lufwa samu na muntu nyonso.

Samu na yinki ba tulaka Yandi yisi kulutila Bawanzio? Samu ti Yandi kumeka lufwa. Yandi zolaka kufwa. Yandi zolaka kwiza, samu na kufwa.

¹⁵⁵ Beno tala awa, nkundi. Beno zimbana ata fyoti ve, yayi. Ntangu Yesu vwandaka kwenda, vwandaka mata mongo, lufwa vwandaka sala makelele pene-pene ya yintu ya Yandi.

¹⁵⁶ Beto baka kizizi ya beto na Jérusalem, mafunda zole ya bamvula me luta. Mpe wapi mutindu beno lenda manga Yawu? Mu ke na kuwa makelele kuwakana na bala-bala. Yinki ya kele? Ya kele kubula ya kima mosi. Ya kele kulunsi ya ntama ya ngolo yina ke na kubelama, ke na kubasika na bamwelo ya Damas, yina ke na kubula na ba-pavé. Ba-pavé yango ya nene kele dyaka kuna. Ya ke na kubula na ba-pavé yayi ya nene, mbu-mbum. Mu ke mona matona ya Menga na bala-bala. Yinki ya kele? Ya kele Muntu yina me sala ata yimbi ve; kima mosi ve kasi mbote. Bantu vwandaka ya kufwa meso. Bawu zabaka Yandi ve. Bawu bakulaka Yandi ve.

Beno ke tuba, “Ya kufwa meso? Ba vwandaka na meso?”

¹⁵⁷ Beno lenda dyaka vwanda na meso mpe kuvwanda ya kufwa meso. Beno ke kwikila yawu? Biblia me tuba mutindu yina. Beno bambuka moyo na Élisée na Dothan? Yandi basikaka mpe kufwaka bantu meso, yandi tubaka, “Ntangu yayi beno landa munu.” Ba vwandaka ya kufwa meso samu na yandi.

¹⁵⁸ Mpe bantu kele ya kufwa meso na nkokila yayi. Dibuuundu mosi yina ke kwikilaka ve na kubeluka ya Kinzambi, kwizaka na munu kilumbu mosi, mpe tubaka, “Kufwa munu meso. Kufwa munu meso.” Ya vwandaka na yinzo ya Mpangi ya bakala Wright. Yandi tubaka, “Kufwa munu meso.” Yandi tubaka, “Paul kufwaka muntu meso, kilumbu mosi.” Yandi tubaka, “Kufwa munu meso.”

159 Mu tubaka, “Nkundi, dyabulu me sala yawu yimeni. Nge kele yimeni ya kufwa meso. Kieleka, nge kele.”

160 Yandi tubaka, “Belusa mwa mwana yayi ya kento mpe mu ke kwikila nge.”

161 Mu tubaka, “Vuukisa musumuki yina mpe mu ke kwikila nge.” Kieleka.

162 “Oh,” yandi tubaka, “yandi fwana kwikila.”

163 Mu tubaka, “Kima mutindu mosi awa, ya fwana luta na lemvo ya nene ya Nzambi.”

164 Dyabulu, nzambi ya yinza yayi, me kufwa bantu meso. “Bawu ke na meso kasi bawu lenda ve kumona,” me tuba Biblia.

165 Awa Yandi vwandaka, vwandaka mata bala-bala, na kubikaka na manima bintambi ya Menga na nzila. *Nyosi* ya lufwa vwandaka tsokota pene-pene ya Yandi, vwandaka sala Yandi makelele, “Kaka mwa ntangu fyoti mpe mu ke kuzwa Nge.” Yandi vwandaka lemba, vwandaka na nsatu ya maza.

166 Ba kubulaka munu kilumbu mosi, mu vwandaka ya kutanda awa na mfinda, menga vwandaka basika munu. Mu bokaka samu na maza. Mpe mpangi ya munu kimaka, bakaka yimpu ya yandi mpe tulaka yawu na kati ya maza; maza ya ntama ya kukangama, ya kifuluka na mwa baniama ya fyoti. Yandi me belama, mpe mu bikaka yinwa ya munu pwelele; yandi me bweta yawu. Samu ti, menga vwandaka basika nswalu-nswalu mutindu yinto ya maza, kisika ba pasulaka munu na munduki. Munu na nsatu ya maza!

167 Na yina mu zaba na yina Mfumu ya munu zolaka lutila, na manima menga kubasika suka nyonso yina, katuka ngunga ya yivwa tii ngunga ya tatu na manima ya midi, na kuzimbisaka Menga nyonso yina. Mu ke mona robe ya Yandi, mutindu mwa matona na zulu ya yawu. Mpe matona yango nyonso bandaka na kukuma nene mingi mpe vwandaka vukana, samu na kusala ditona ya Menga ya nene mingi, na kubulaka Yandi na dikulu na yina Yandi vwandaka tambula. Ya vwandaka Menga ya Emmanuel. Oh, ntoto vwandaka ve ya kulunga samu na Yawu.

168 Kasi na yina Yandi vwandaka mata, *nyosi* yayi vwandaka tsokota pene-pene ya Yandi. Yinki ya salaka? Na nsuka ya tsokotaka Yandi.

Kasi, mpangi, muntu nyonso zaba, ti mwa baniama ya fyoti to nyosi, kana ya tsokota nge mbala mosi, yina ke sukisa dyambu ya kutsokota. Ya ke lenda dyaka ve na kutsokota. Samu ti, ntangu yawu ke katuka, ya ke katula ntunga ya yandi.

Ya kele samu na yina Nzambi zolaka kuma nsuni. Yandi bakaka ntunga ya lufwa na nzutu ya Yandi, mpe Yandi basisaka ntunga ya lufwa. Nkembo na Nkumbu ya Mfumu! Lufwa lenda yimba mpe kutsokota, kasi ya lenda ve kutalisa beno mpasi.

169 Paul, ntangu yandi kuwaka *nyosi* yango kuyimba pene-pene ya yandi, lufwa vwandaka belama kaka. Yandi tubaka, “O lufwa, wapi kisika kele ntunga ya nge?” Yandi vwandaka lakisa na Calvaire kisika yawu kubikanaka na nzutu ya Emmanuel. “Wapi kisika kele lunungu ya nge? Kasi matondo na Nzambi yina pesaka beto lunungu na nzila ya Mfumu ya beto Yesu Klisto.” Inga.

170 Beto ke mona ve bima nyonso.

Kasi beto ke mona Yesu, yina ba salaka mwa yisi kulutila bawanzio samu...na mpasi ya lufwa,...

Samu ti ya me kuma yandi, samu na yandi bima nyonso—nyonso kele, ti na nzila ya yandi beto kuzwa bima nyonso, na kubanda...bana mingi ya babakala...mpe kumaka mfumu kapita ya mpulusu ya beto...na nzila ya kutala mpasi.

Mutindu kaka Yandi zolaka kukuma Kapita ya mpulusu ya beto, Yandi zolaka tala mpasi.

171 Beno kuwa Bandinga ya kitoko yayi awa ntangu yayi. Ntangu yayi beno kuwa.

Samu ti yandi yina ke santisaka mpe bayina kele ya kusantisa bawu nyonso...mosi:...

Oh, beno ke mona ve Vinu mpe kintala kuna? Nyonso mosi.

...samu na yina yandi kele ve na nsoni ba bokila yandi bampangi,

Beno me mona? Samu na yinki? Beno kuwa, nzila yina ke landa.

Yandi tubaka, mu ke zabisa nkumbu ya nge na bampangi ya munu, na kati ya dibuundu mu ke yimbila balukumu na nge.

Mpe dyaka, mu ke tula kivuvu ya munu na yandi. Mpe dyaka, Tala munu mpe bana yina nge me pesa munu.

Samu na yina mutindu bana kele na banzutu mpe menga, yandi mpe yandi mosi me kuma mutindu bawu; ti na nzila ya lufwa yandi kubebisa yandi yina kele na ngolo ya lufwa, yina kele, dyabulu;

Mpe me kuula bawu bayina na nzila...samu... na nzila...samu lufwa vwandaka ntangu nyonso ya kukangama na bundongo.

172 Muntu ntangu nyonso ke vwandaka na boma ya lufwa. Klisto kumaka disumu, kumaka yisi, samu na kubaka na zulu ya Yandi lufwa. Mpe Yandi kele ve na nsoni ti ba bokila Yandi “Mpangi” ya beto, samu ti ba mekaka Yandi kaka mutindu beto kele ya kumeka. Mpe Yandi lenda sala...vwanda mutindu ya nzonzi ya kulunga, samu ti Yandi kangaka ntima na mutindu mosi ya mpukumunu yina beno ke kangaka ntima. Mpe Yandi bakaka

kisika ya beno, na kuzabaka ti beno ke lenda ve na kubaka yawu beno mosi.

173 Na yawu, beno ke mona ve, mpangi ya bakala, mpangi ya kento? Ti kima nyonso kele lemvo. Nyonso ya yawu kele lemvo. Ya kele ve yina beno ke salaka, na mutindu nyonso. Ya kele yina Yandi salaka yimeni samu na beno. Ntangu yayi, beno lenda sala ve kima mosi samu na kuzwa mpulusu ya beno. Mpulusu ya beno kele dikabu. Klisto kumaka disumu, samu ti beno kuma ya kulunga. Mpe Yandi kele mutindu ya kulunga ya Mfumu Kapita samu na mpulusu ya beto, samu ti Yandi talaka mpasi kaka mutindu beto talaka mpasi. Ba mekaka Yandi kaka mutindu beto kele ya kumeka. Mpe Yandi kele ve na nsoni ba bokila Yandi “Mpangi ya beto,” samu ti Yandi zaba na yina beto ke na kulutila. Oh, nkembo na Nkumbu ya Yandi!

Ya kieleka yandi bakaka ve na zulu ya yandi nzutu ya bawanzio; kasi yandi bakaka na zulu ya yandi nkuna ya Abraham.

174 Oh, la la! Yandi kumaka ve Wanzio. Yandi kumaka Nkuna ya Abraham. “Mpe beto, na kuvwandaka ya kufwa na Klisto, ke kuma Nkuna ya Abraham, mpe kele bibyadi landila nsilulu.” Beno me mona? Ata mbala mosi ve ti Yandi bakaka nzutu ya Wanzio. Ata mbala mosi ve ti Yandi kumaka Wanzio. Yandi kumaka Muntu. Yandi kumaka Nkuna ya Abraham, mpe bakaka ntunga ya lufwa na nzutu ya Yandi Mosi, samu na kuvutula ngwisani na beto na Nzambi, mpe ntangu yayi me vwanda kuna mutindu Musambidi. Oh, wapi mutindu beto ke manga Yawu, nkundi?

175 Beno kuwa.

Na yawu yina na bima nyonso yandi fwanaka kuma mutindu mosi na bampangi ya yandi, samu ti yandi vwanda nganga-Nzambi ya ntete ya kyadi mpe ya kukwikama na bima ya kisalu ya Nzambi, samu na kukatula disumu ya bantu.

176 Samu ti Yandi vwanda Muntu ke sala ngwisani! Beno me mona, ya vwandaka na kimbeni na kati-kati ya Nzambi mpe muntu. Mpe muntu ve. . .

Ba fidisaka bawanzio, baprofete. Bawu zolaka baka kisika ya beno ve, samu ti bawu zolaka sambila samu na bawu mosi. Bawu zolaka baka kisika ve.

177 Na yawu, Yandi fidisaka musiku. Musiku vwandaka pulusu yina ke tula beto na boloko. Ya zolaka basisa beto ve. Yandi fidisaka musiku.

Yandi fidisaka baprofete, Yandi fidisaka bantu ya kudedama, mpe nyonso yina, zolaka katula ve masumu. Kasi Yandi kulumukaka mpe kumaka mosi ya beto. Oh, la la!

¹⁷⁸ Kana beto zolaka kaka kuzwa ntangu mingi ntangu yayi, mu zolaka nata beno na musiku yango ya mpulusu; kasi beto kele na ntangu ve, kasi samu kaka na mwa ntangu fyoti. Kizizi ya kitoko kele na Ruth mpe Naomi. Kana beno ke mona kuna, kuvutula ngwisani, mutindu bakala ya makwela yina, muntu yina zolaka vulusa bima yina zimbanaka mpe ya kubwa, zolaka vwanda muntu ya dikanda ya muntu yina zimbisaka bima. Ya kele samu na yina Boaz zolaka vwanda . . .vwandaka tata mukudi ya Naomi, samu ti yandi baka Ruth. Mpe kuna, yandi zolaka vwanda ya kulunga. Yandi zolaka vwanda na lenda ya kusala yawu, samu na kuvuukisa yina zimbanaka. Mpe Boaz, na nkotolo, pesaka kimbangi na ntwala ya bantu nyonso, na kukatulaka sapatu ya yandi, ti yandi me kuula Naomi mpe nyonso ya yandi. Mpe yandi zolaka vwanda muntu ya dikanda.

¹⁷⁹ Mpe ya kele samu na yina ti Klisto, Nzambi, zolaka kuma muntu ya beto ya dikanda. Mpe Yandi kulumukaka mpe vwandaka Muntu. Mpe Yandi talaka mpasi ya mpukumunu. Mpe ba sekaka Yandi, ba vwandaka seka Yandi, mpe talisaka Yandi mpasi, mpe vwandaka kipe Yandi ve, mpe ba bokilaka Yandi “Béelzébul,” mpe—mpe ba vwenzaka, mpe talaka mpasi ya lufwa na yisi ya kitumbu ya nene. Beno me mona? Yandi zolaka vwanda muntu ya beto ya dikanda. Ba zolaka fundisa Yandi na kuvunaka, samu ti ba ke fundisaka beno na kuvunaka. Yandi zolaka vwanda ya kubela, samu ti beno kele ya kubela. Yandi zolaka nata masumu, samu ti ya vwandaka masumu ya beno. Mpe Yandi zolaka vwanda muntu ya dikanda. Mutindu kaka Yandi zolaka vulusa beto vwandaka na kuvwanda muntu ya beto ya dikanda. Mpe mutindu Yandi kumaka muntu ya dikanda, ya kele na nzila ya kubakaka mutindu ya nzutu ya disumu mpe kukuma mosi ya beto. Mpe na yina, Yandi futaka ntalu mpe kuulaka beto na kuvutuka na kubundana ya Tata. Oh, wapi Mvulusi! Bampova lenda ve kutuba yawu.

Samu ti yandi mosi talaka mpasi na kuvwandaka muntu, . . . mpe lenda kusadisa bayina ba ke na kumeka.

¹⁸⁰ *Kusadisa zola kutuba “kutala mpasi.”* Mpe, ya kele samu na yina Yandi kumaka *yayi*, samu ti Yandi tala mpasi na beno beno bayina kele . . . ke na *bakumata* mpe *bakukulumuka*, mpe *bakati* mpe *bangaanda* ya beno, mpe bampukumunu ya beno ke kumaka nene mingi ti na mpasi beno lenda telemina yawu. Yandi zaba mutindu ya kutala mpasi na beno. Yandi kele ya kuvwanda kuna, samu na kusambila. Yandi kele ya kuvwanda kuna, samu na zola ya beno. Mpe ata ti beno zimbana, Yandi ke bika beno ve. Yandi ke kwiza dyaka na manima ya beno mpe ke konkota na ntima ya beno. Ya kele ve na retrograde na kati ya kivinga yina zaba ve ti Nzambi ke bulaka na ntima ya yandi konso kilumbu. Mpe Yandi ke sala yawu ntangu nyonso yina beno kele muntu yina ke kufwa na zulu ya ntoto yayi, samu ti Yandi zolaka beno. Yandi kuulaka beno.

181 Ba-poète me meka, misoniki ke na kumekaka, muntu ke na kumekaka na kutubila na dyambu yango ya “zola,” mpe bakutuba ya bantu kele na lenda yango ve. Mosi tubaka:

Oh, luzolo ya Nzambi, ya mvwama mpe ya kuvedila!

Ya kukondwa lubakusu mpe ngolo!

Yawu ke vwanda ntangu nyonso,

Nkunga ya basantu mpe ya Bawanzio.

Kana beto na mubu ya kufuluka na tinta,

Mpe ti mazulu kele buku;

Konso mwinga na ntoto disala,

Mpe ti konso muntu musoniki;

Kusonika zola ya Nzambi

Ke yumisa mubu;

To buku ke lunga nyonso ve,

Ata yinda ya zulu na zulu.

182 Ata mbala mosi ve beno ke bakula. Ya kele ve na mutindu samu na beto na kubakula mutindu ti munkayulu yango ya nene, yina Yandi salaka, kulumukaka mpe vutulaka ngwisani beto na Nzambi. Na manima Yandi vutukaka mpe tubaka, “Ntangu yayi, Mu ke bika beno bansaana ve. Mu ke kwiza dyaka mpe ke vwanda na beno, mpe na kati ya beno, tii nsuka ya yinza.”

183 Mpe awa beto kele bubu yayi, ke na kuzinga na ntangu ya nsuka, na Yesu mosi, na bima mosi, bidimbu mosi, mambu ya ngitukulu mosi, mpulusu mosi, Mpeve mosi yina ke na kusalaka bima mosi, Nsangu ya mbote mosi, Ndinga mosi, na bifwanukusu mosi, kumonisama ya mutindu mosi, nyonso. Ya me tala beto na kubebisa ve mpulusu ya nene yayi, samu ti beto ke pesa mvutu, kilumbu, na yina beto ke sala na Mwana ya Nzambi.

184 Yandi kele na maboko ya beno na nkokila yayi, musumuki, retrograde. Yinki beno ke sala na Yandi? Beno ke tuba, “Mbote, mu ke tala Yawu na ntwala.” Kasi, beno bambuka moyo, beno sala yina ve. Ya kele ve na mutindu, ata fyoti ve, kana beno kele musumuki, ti beno ke katuka kivinga yayi mpe kuvwanda mutindu mosi. Beno lenda sala yawu ve.

185 Pilate, mpimpa mosi, mekaka na kusala yawu. Yandi lombaka mwa maza mpe yandi me sukula maboko ya yandi. Yandi tubaka, “Mu ke na kima ve ya kusala na Yawu. Mu kele kaka mutindu ti mu monaka Yawu ve. Mu kuwaka ve Nsangu ya mbote. Mu zola kima ve ya kusala na Yawu.” Yandi lendaka kukatula Yawu na maboko ya yandi? Yandi lendaka ve.

186 Na nsuka, beno zaba yinki kusalamaka na Pilate? Yandi zimbisaka dibanza ya yandi. Mpe na zulu kuna na Suisse, kisika beto vwandaka mvula me luta, na kulonga Nsangu ya mbote, ntangu yayi ya kele na légende yina ke tuba, ti, ya kele na ndonga ya nene ya maza kuna, kisika bantu ke kwizaka katuka yinza nyonso, samu na kutala, konso mvula, na ntangu ya crucifixion.

Pilate, yandi mosi kwendaka na nswalu nyonso na lufwa, na kudifwaka, na kudumukaka na maza yayi mpe dyamaka. Mpe konso mvula, na kilumbu yina mosi, maza ya bleu ke tokaka na ndonga yango ya nene, samu na kulakisa ti Nzambi mangaka maza. Maza lenda ata mbala mosi ve kusukula Menga ya Yesu na maboko ya beno to na moyo ya beno. Ya kele kaka na mutindu mosi ya kusala yawu, ya kele kundima Yawu mutindu lemvo ya nge mosi mpe kuvutula ngwisani na Nzambi.

Beto sambila.

¹⁸⁷ Tata ya Mazulu, beto me tonda Nge na nkokila yayi samu na Ndinga. “Samu ti lukwikilu ke kwizaka na nzila ya kuwa, mpe kuwa na nzila ya Ndinga.” Beto me tonda Nge samu na Yesu. Mpe mutindu beto ke mona kilumbu ya nene yayi yina beto ke na kuzinga, mutindu bidimbu mpe mambu ya ngitukulu, mutindu beto ke kunatama ntama ya bima yayi. Nzambi, fungula meso ya bantu na tabernacle yayi, na nkokila yayi, samu ti bawu mona mpe bakula ti beto kele na bangunga ya nsuka. Ntangu kele nkufi. Beto kele na ntangu mingi ve ya kuvwanda awa, mpe beto fwana mona Yesu. Mpe ba fwana tanga beto mutindu miyekudi, samu ti ya ke vwanda ve na raison. Na suka yayi, ntangu Nge vwandaka me pesa vision yina ya nene, ya ngolo, ya muntu yina me kwiza awa, yina me katuka yinsi ya ntama kuna; mpe kumona yandi, kukondwa ntembe, me telama na fauteuil roulant yina, kuzwa kumona ya yandi. Makulu ya yandi me kuma na ngolo, me kwenda kivinga nyonso, na kusepelaka mpe kukembisaka Nzambi. Ya ke lakisa ti Nzambi kele dyaka na lenda na kubasisa na matadi yayi bana ya Abraham. Na kumona ba-vision, mutindu Yesu tubaka, “Mu ke sala kima ve tii Tata ke lakisa Munu. Mu lenda sala kima mosi ve.”

¹⁸⁸ Bampofu landaka Yandi, mpe tubaka, “Tala beto kyadi.”

¹⁸⁹ Yandi tubaka, simbaka meso ya bawu mpe tubaka, “Landila lukwikilu ya beno, ti ya salama na beno.”

¹⁹⁰ Ntangu yayi, Mfumu, beto ke mona Yesu. Beto ke mona bima nyonso ve. Beto ke mona beto kunata bansantu ya beto na ndyamu, mpe kutambula na zulu ya mosi na yankaka ndyamu. Kasi beto ke mona Yesu, yina salaka nsilulu. Beto ke mona Yandi na beto. Ve Yesu na ndyamu, ve Yesu bamvula mafunda zole me luta; kasi Yesu na nkokila yayi, yina kele na beto. Beto ke mona Yandi kutalana na ngolo ya Yandi nyonso, mpe bidimbu, mpe mambu ya ngitukulu.

¹⁹¹ Nzambi, ti ata mbala mosi ve beto me mona mpamba Mpulusu ya nene yayi. Kasi ti beto baka Yawu, mpe ndima Yawu, mpe kuvwanda na buzitu, mpe kuzinga na nzila ya Yawu tii kilumbu yina Yesu ke kwiza samu na kunata beto na Yinz. Pesa yawu, Mfumu. Beto me lomba yawu na Nkumbu ya Yandi.

¹⁹² Mpe na yina bayintu ya beto kele ya kukulumusa, mu ke kumiyufula kana ya kele na muntu na kati ya kivinga yayi na

nkokila yayi, na yisi ya Mvwandulu ya Kinzambi ya Mpeve-Santu, beno zola kutuba, “Mpangi Branham, mu me ndima ti mu kele na foti. Mu me ndima ti mu kele naa foti. Nzambi me monikisa munu masumu ya munu. Mpe mu zaba ti mu kele na foti. Mu ke telemisa diboko ya munu na Yandi mpe ke lomba kyadi, na nkokila yayi. Nzambi, tala munu kyadi. Mu kele na foti.” Beno zola kusala yawu?

¹⁹³ Na yina beto ke vingila kaka mwa ntangu fyoti, kana ya kele na muntu awa yina zola, ya ke vwanda na mbotika ke salama kaka na mwa ntangu fyoti. Mpe kana beno kele musumuki, munu na kisika ya beno mu zola kubalula ntima. Wapi mutindu beno lenda manga mutindu ya zola yina ba lenda fwanikisa ve ya Yandi yina kufwaka? Nzambi ya santu ya Mazulu kumaka Muntu ya disumu; ve samu ti Yandi sumukaka, kasi samu ti Yandi bakaka masumu ya beno, mpe nata yawu kuna na Calvaire. Mpe beno ke ndima ve lemvo yango? Beno zola ve kusala yawu na nkokila yayi? Na yina beto kele na bayintu ya beto ya kukulumusa, ti muntu tuba, “Bambuka moyo na munu, Mpangi Branham. Mu ke telemisa maboko ya munu na Klisto, mpe ke tuba, ‘Tala munu kyadi. Mu—mu kele na foti, mpe mu zola kuvutula ngwisani na Nzambi.’” Beno zola kutelemisa diboko ya beno?

Mbote mingi, kana bantu nyonso kele Miklisto, na yina, beto sambila.

¹⁹⁴ Tata, beto ke tonda Nge na nkokila yayi, ti bantu nyonso na kati awa kele Miklisto, ti bawu me pesa kimbangi mosi na kuvwandaka swi, ti masumu ya bawu nyonso kele na yisi ya Menga. Mpe mu ke na kuvutula matondo samu na yawu. Sakumuna bawu, Mfumu. Oh, mu kele na kyese mingi ti bawu me tala kuvutula ngwisani na nzila ya munkayulu ya Menga, na kuwaka Ndinga. Kusukula ya maza, na nzila ya Ndinga, Yawu me vedisa beto. Yawu ke nata beto na kisika ya nene mingi, kisika—kisika musumuki, na ndombi ya yandi ya yimbi, ke kumaka mpembe mutindu mvula ya mpembe. Ba me sukula matona ya mbwaki ya disumu, mpe beto kele bivangu ya malumu na Klisto. Mutindu beto ke tonda yawu, Nge, samu na yayi.

Ntangu yayi kusalu ya mbotika ke banda. Mu me bakula ti ntwenya ya mama yayi, na nkokila yayi, ke kuzwa mbotika awa, na Nkumbu ya Mfumu ya yandi.

¹⁹⁵ O Tata ya Mazulu, beto ke sambila ti Nge sakumuna ntwenya ya kento yayi. Mutindu dibanza ya munu ke vutuka kaka na mwa bilumbu me luta, na yina mu vwandaka kuma na Henryville mpe monaka mwa mwana ya kento yina ya luzolo kutambula kuna na bala-bala. Mpe na nkokila yayi, yandi kele mama, kento. Yandi me ndima Nge mutindu Mvulusi ya yandi mosi. Luzingu me vwanda mpasi samu na mwana, Mfumu, O Nzambi, kasi Dizulu kele kieleka samu na yandi. Mpe beto ke tonda Nge samu na

yawu. Beto ke sambila, Nzambi, ti Nge ke sakumuna ntwenya ya mama ntangu yayi. Mpe na yina yandi ke kwiza samu na kuzwa mbotika na maza, ti Nge fulusa yandi na Mpeve-Santu ya Nzambi. Pesa yawu, Mfumu. Ti moyo ya yandi vwanda kieleka ya kunatama na kyese, tii na Mazulu! Pesa yawu samu na nkembo ya Nge. Beto me lomba yawu na Nkumbu ya Yesu. Amen.

¹⁹⁶ [Kisika ya mpamba na bande—Mu.] Mu zola kutanga na Actes, kapu ya 2; Pierre ke na kuzonza, na Kilumbu ya Pantekote, mbotika ya ntete yina salamaka na Dibuundu ya Buklisto. Pierre, ke na kusemba ba-Pharisien mpe bantu ya kufwa meso, na kuzabaka ve Mwana ya Nzambi; ke na kuzonza na mutindu ti Nzambi me vumbula Yandi, mpe me teza bisalu ya Yandi, na bidimbu mpe mambu ya nene. Beto kuwa yayi, na yina yandi ke zonza. Yandi vwandaka kembisa Yesu.

¹⁹⁷ Konso mpeve ya Muklisto ke kembisaka Yesu, ve kaka na bikoba ya beno, kasi na nzila ya luzingu ya beno. Bikoba ya beno lenda tuba kima mosi, luzingu ya beno ke sala yankaka. Kana beno sala yawu, beno zaba yinki ya kele? Ya kele luvunu. Mpe mu ke zola kukutana Mazulu mutindu muntu ya ntembe ti mutindu muntu ya luvunu. Siansi ya munu ke vwanda mingi, mu banza, na Mazulu, mutindu—mutindu muntu ya ntembe, ti kuvwanda muntu ya luvunu. Munu kieleka . . . Kana beno ke pesa kimbangi samu na Yesu mpe ke tuba “Yandi kele Mvulusi,” beno zinga mutindu yina, samu ti bantu ke vingila na kumona yawu na beno. Ya kele kieleka. Beno zinga mutindu Muklisto fwana. Beto me tala yawu na suka yayi.

¹⁹⁸ Ntangu yayi, kana Mfumu zola, mbasi na nkokila, to . . . Kilumbu ya tatu na nkokila, beto ke baka kapu ya 3 yayi, yina kele kapu ya kuyituka. Mpe ntangu yayi, beno sala nyonso na kumeka na kwiza Kilumbu ya tatu na nkokila. Bantu yikwa ke na kusepela na Buku yayi, ya malongi ya lukolo ya Lumingu yayi? [Dibuundu me tuba, “Amen.”—Mu.] Oh, matondo mingi na beno. Ya kele mbote.

¹⁹⁹ Ntangu yayi, mu zola kutanga awa na Actes, kapu ya 2, kubanda na nzila ya 32.

Yesu yayi yina Nzambi me vumbulaka, beto . . . kele bambangi. (Bawu zabaka yawu.)

Me zanguka na lweka ya diboko ya kibakala ya Nzambi, mpe me kuzwa na Tata nsilulu ya Mpeve-Santu, Yandi me mwangisa yayi, yina beno ntangu yayi ke kumona mpe ke na kuwa.

²⁰⁰ Ntangu yayi beno kuwa yandi kuzonza na yina me tala David, mosi ya bawanzio.

Samu ti David kwendaka ve na zulu: kasi yandi tubaka yandi mosi, MFUMU me tuba na Mfumu ya munu, Vwanda na lweka ya diboko ya munu ya kibakala,

Tii ntangu mu ke sala bambeni ya nge kisika ya nge ya kutula makulu.

David zolaka mata ve; yandi vwandaka na yisi ya menga yina basikaka na ba-génisse, mpe bankombo, mpe mameme. Kasi awa yandi zolaka vumbuka; yandi vwandaka na yisi ya Menga ya Mfumu Yesu. Samu ti bawu zolaka kuzwa mvutu ya Menga yango ntangu Yawu zolaka kwiza na ngolo. Ntangu Menga ya Klisto kwizaka na ngolo, bawu nyonso yina kufwaka na ntangu ya mbote, kuvumbukaka, ya kele kieleka, mpe mataka na Nkembo.

²⁰¹ Ntangu yayi beno kuwa.

Na yawu ti yinzo nyonso ya Israël kuzaba . . . (Beno kuwa yayi.) . . . ti Nzambi me sala Yesu mosi yayi, yina beno . . . komaka na kulunsi, Mfumu mpe Klisto.

Yinki samu na yina? Yandi kele Muntu ya tatu na butatu, to Yandi kele butatu ya muvimba? Yandi kele kufuluka ya muvimba ya Kinzambi, na nzutu.

²⁰² Ya kele ve na kima mutindu Banzambi tatu: Nzambi Tata, Nzambi Mwana, mpe Nzambi Mpeve-Santu. Ya kele ve na Masonuku, kisika mosi. Kisika mosi ve ya kele. Kisika mosi ve beto me kuzwaka lutumu ya kubotika, “Na nkumbu ya Tata, mpe na nkumbu ya Mwana, mpe na nkumbu ya Mpeve-Santu,” ata kisika mosi ve na Masonuku. Ya kele credo ya Katolika, mpe ya kele ve samu na dibuundu ya ba-Protestant. Mu ke lomba na muntu nyonso na kulakisa munu Disonuku mosi kisika muntu kuzwa ntete mbotika na mutindu yankaka ti na Nkumbu ya Mfumu Yesu Klisto. Beno kwiza, lakisa munu yawu, mpe mu ke tula kidimbu na manima ya munu, “Muntu ya luvunu, mpe profete ya luvunu, mulongisi ya luvunu,” mpe kutambula babala-bala. Ya kele ve na kima ya mutindu. Ata mbala mosi ve muntu mosi kuzwaka mbotika na mutindu yina. Ya kele credo ya Katolika, mpe ve malongi ya ba-Protestant.

²⁰³ “Matthieu 28:19,” beno ke tuba, “Yesu tubaka, ‘Beno kwenda yinza nyonso, beno longa bayinsi nyonso, beno botika bawu na Nkumbu ya Tata, Mwana, mpe Mpeve-Santu.’” Ya kele ya kulunga.

Kasi ve, “Na nkumbu ya Tata, na nkumbu ya Mwana, na nkumbu ya Mpeve-Santu.” *Nkumbu ya Tata, Nkumbu* (bankumbu ve), ya Tata . . .

Tata kele ve nkumbu. Bantu yikwa zaba yawu? Batata yikwa kele kuna awa? Beno telemisa maboko ya beno. Bana yikwa kele awa? Beno telemisa diboko ya beno. Bantu yikwa kele awa? Beno telemisa maboko ya beno. Mbote mingi. Ntangu yayi, yinki kele nkumbu ya beno? Tata ve, mwana ve, to dyaka muntu ve.

204 Kento mosi tubaka na munu kilumbu mosi, yandi vwandaka trithéiste ya ngolo, yandi tubaka, “Mpangi Branham, kasi Mpeve-Santu kele nkumbu.”

205 Mu tubaka, “Mpeve-Santu kele nkumbu ve, Mpeve-Santu kele yina Yawu kele. Yawu *kele* Mpeve-Santu, nkumbu ve, ya kele yina Yawu kele. Mu kele muntu, kasi nkumbu ya munu kele muntu ve, nkumbu ya munu kele William Branham.”

206 Na yawu, kana Yandi tubaka, “Beno kwenda longa bayinsi nyonso, beno botika bawu na *Nkumbu* ya Tata, mpe ya Mwana, mpe ya Mpeve-Santu,” kuna Pierre, na manima ya bilumbu kumi, me tuba, “Beno balula ntima,” Ntangu yayi, awa, beno kuwa yayi:

Mpe ntangu bawu kuwaka yayi, bawu kuyitukaka na ntima ya bawu, mpe tubaka na Pierre mpe... bayankaka ya bantumwa, Bampangi, yinki beto fwana sala?

Kuna Pierre tubaka na bawu, Beno balula ntima, mosi na mosi ya beno, mpe beno botama na nkumbu ya Mfumu Yesu Klisto samu na lemvo ya masumu ya beno, mpe beno ke kuzwa dikabu ya Mpeve-Santu.

207 Na yina Pierre salaka ve yina Yesu tubilaka yandi na kusala ve? Yandi vwandaka na kati ya potopoto ve, beto kele bayina kele na kati ya potopoto.

208 Na Actes 2:38, ba-Juif kuzwaka mbotika na Nkumbu ya Mfumu Yesu Klisto, na kukotaka na kati ya maza.

Na Actes, kapu ya 8, beto ke tala ti Philippe kwendaka mpe longaka na bantu ya Samarie, mpe botikaka bawu na Nkumbu ya Mfumu Yesu Klisto, bantu ya Samarie.

Na Actes 10:49, Pierre pesaka lutumu na Bantu ya makanda na kuzwa mbotika na Nkumbu ya Mfumu Yesu Klisto.

209 Paul, na Actes 10:5, “Yandi lutaka na simu ya zulu ya Éphèse, yandi talaka bilandi.” Bawu vwandaka bilandi ya ba-Baptiste; mosi na mosi, vwandaka, ya ba-Baptiste. Bawu ndimaka na yisi ya mulongi ya Baptiste na nkumbu ya—ya, beno me mona, Apollos. Mpe yandi vwandaka mulongi ya Baptiste, “Mpe vwandaka lakisa na nzila ya Biblia ti Yesu vwandaka Klisto.”

Paul tubaka, “Beno kuzwaka Mpeve-Santu ntangu beno kukwikilaka?”

210 Bawu tubaka, “Beto zaba ve ti ya kele na kima mutindu Mpeve-Santu.”

211 Yandi tubaka, “Na yina wapi mutindu ba botikaka beno?”


212 Bawu tubaka, “Beto kuzwaka mbotika na nzila ya muntu yina botikaka Yesu, na maza kuna. Ya me lunga beto.”

²¹³ Paul tubaka, “Yina ke simba ve ntangu yayi. Beno fwana kuzwa mbotika, dyaka.” Mpe Paul pesaka bawu lutumu na kuzwa mbotika, dyaka, na Nkumbu ya Mfumu Yesu Klisto. Yandi tentikaka bawu maboko, mpe Mpeve-Santu kwizaka na zulu ya bawu. Ya kulunga. Yinga, tata.

Ya ke vwanda na Nsemo na ntangu ya mpimpa,
 Nzila ya Nkembo kieleka beno ke mona;
 Na nzila ya maza, yina kele Nsemo bubu yayi,
 Kuzikama na Nkumbu ya ntalu ya Yesu.
 Ntwenya mpe kuluntu, beno fungula masumu
 ya beno nionso,
 Mpeve-Santu kieleka ke kota;
 Nsemo ya mpimpa me kwiza,
 Ya kele makieleka ti Nzambi mpe Klisto kele
 Mosi.

²¹⁴ Ya kele yina Biblia tubaka. Ya kele kieleka. Ya kele ngunga, ya kele ntangu ti beto fwana fungula masumu.

²¹⁵ Beno tuba, looka ntangu beno ke kubama, na kati ya ndonga ya nene ya maza. Mpe beto ke . . . [Mpangi mosi ke tuba, “Beto me kubama.”—Mu.] Beno me kubama? Mbote mingi, samu na kubenda balele ya nela.

²¹⁶ Ntangu yayi, Mfumu kusakumuna beno ntangu yayi, na yina mpangi ke sala mbotika. Beno nyonso lenda mona awa? 

HÉBREUX, KAPU YA ZOLE ² KNG57-0825E
(Hebrews, Chapter Two ²)

BANDANDANI YA BUKU YA BA-HEBREUX

Nsangu yayi ya Mpangi William Marrion Branham, kulongamaka na Kingelesi, na Lumingu na nkokila, kilumbu ya 25 ya Ngonda ya nana, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org